



滇臺行稿卷之二

呈兩院處總鎮事宜揭帖

雲南布政司右叅政徐斌謹

稟伏承

臺諭別揭批示仰見

鈞臺關念

國體地方至意不遺葑菲虛懷佩服無任本道媿謏
劣寡識何能仰禪萬一然竊有一得不敢不盡其
愚焉夫本鎮平日心術曖昧倫理薄滅爲天地間
罪人固不暇言乃今彰彰抗違

君命爲



朝廷罪人罪又何逃但此事有二難焉欲速伸
朝廷之法者以爲急之便殊不知急之恐變生欲深
爲地方之計者以爲寬之便殊不知寬之恐玩法
須權於

朝廷地方之間而兩全之斯計之得乎以本道愚見
今奉勘合如仍前抗違聽叅究重處茲

兩臺或當指陳其稱疾抗違之罪會疏上

請裁奪令其回話或差科臣或聽

兩臺會勘隨奪其爵任待罪聽勘以示

朝廷之有法紀卽與其子暫管鎮事待勘明方許赴
京襲爵錄其世功以爲安地方之意蓋待罪聽勘

斯其權自解與其子暫管待勘明後方許赴京襲爵

斯其心自服夫人孰不愛其子而保爵祿哉而况

世爵之子乎原其愛子戀爵之情而堅其尊

君聽命之念似可保其無他至於聽勘之後權衡其罪
而爲議功議貴可也或按得其實而欲盡法焉可

也則在乎會勘之覈實而

恩威出自

朝廷非敢專也此亦明白正大可以瀆

天聽可以對人人言而亦可以使本鎮知者蓋天下之

事每患生於猜疑若涉於猜疑則釀未然之憂而

有莫之知者惟使法紀昭明人心帖服斯於

朝廷地方圖也爲兩全矣大率滇南遠在萬里之外
天朝所以爲耳目彈壓之重寄者惟在

兩臺

廟廊之上亦不過以

兩臺之疏意爲之軒輕耳故不可不慎重之茲其
處置大綱領宜或然者蓋此狐疑鬼魅之徒如群
陰構伏惟慮人知而亦常備人之知何嘗旦夕不
營營也若營營而不得逞勢必跳梁或有他釁處
此不必與之潛圖角處生疑起釁卽每事斷以大
義參以時宜明白處分如太陽當照群陰自消而
亦無所容其構伏矣此於理於法皆當如是而於

事機恐亦不出此若其他籌畫所云恐皆節目亦
未爲妄也本道愚見如斯伏惟

高明裁擇惟

朝廷地方幸甚本道幸甚

雲南等處提刑按察司爲遵奉

明旨懇乞

天恩赦宥事行據委官雲南府知府董原道左等六衛
掌印指揮王輔等昆明縣知縣周德各親詣總府
催促二夫人起程情由呈詳到司據此案照先該
巡按王 題參節奉

撫衙門節准

部院勘合催促黔國公沐朝弼將

太夫人李氏夫人陳氏送往南京居住等因案行
本司已經行仰各官親詣二夫人停止處所看驗
有無病症作何調理應否聽令張氏至滇親探公
同會議去後具由呈詳前來該本司掌印按察使
徐 會同布都貳司掌印左布政使鄔 守巡兵
備等道右叅政莫 副使陳 右叅議曾 僉事
楊 署都指揮僉事趙 爲照節奉勘合催促本
鎮送李陳二夫人前往南京居住一節今據雲南
府左等六衛昆明縣各掌印官親詣看驗回報前
因各司會看得二夫人患病虛實固稱喚醫調理
遽難憑信深居閨闈亦難於接見卽或請見尤難

辯其真僞雖云不願往南京未否的出二夫人之
意亦無實據及查寧陽侯妻張氏奏稱至親者莫
過於骨肉至切者莫甚於母子先年採女至滇已
親見其幽囚之狀目擊瞞蔽之由今起程在途養
病外寺已經月餘陳氏之生蓋有所不能保也痛
心骨肉臣死何辭卽朝彌之奏乞差官驗病陳氏
女流年方四十四歲何嘗老疾外人烏能驗知縱
有詐冒踈者何能認識詳其奏疏則陳氏之疾委
非踈外各官所能看驗其願去南京與否亦非踈
外各官所能探決若復委官查勘文移徒爾展轉
事體終無着落合將本鎮所 奏二夫人疾之虛

實不願往南京情由請乞

本院鈞裁轉達省令陳母張氏或同的當親屬詣滇親入本鎮府中看驗探問則其疾之真偽往南之行止均可明白無他疑慮其本鎮仍行待罪聽勘或鎮事不可缺人合無具

請行令伊嫡長親男暫行管理候勘明之日另

奏定奪庶可以釋群疑杜奏擾而於事體爲安法紀亦彰矣等因呈詳

撫院陳

批如擬候會

奏明文至日施行此繳

按院劉

批依擬候會

奏明文至日遵行繳

雲南等處提刑按察司爲路當衝要五路通衢夫少差繁困窮極苦懇遵勘合革減以甦民生事隆慶貳年拾貳月貳拾玖日申時奉

巡撫陳

批據本司呈行准清軍驛傳道關看得

役忌濫供法取畫一今照該堡夫役除撥候

兩院衙門轎夫已有定數無容別議外所有司道轎夫正擡貼擡舊規各捌名今議貼班只用肆名雲南府管糧通判照舊借用半級外其掌印官常川轎夫亦准堡夫捌名清軍理刑官陸名若有差委遠涉則臨時另呈總司驛傳道酌量添換在省城奉委官員應撥用轎役者亦准呈請轎傘夫伍

名用訖之日仍將役過日期報司道查考發堡扣查役過日期勞逸通融挨撥其鄉宦致政九卿衙門與列銜方面者俱准轎夫肆名餘俱不得濫用仍責令該堡將各軍夫盡數查明一樣二本申送司道覈實印發該堡輪流挨次點撥有賣放躲閑及被故意重役者許偏累之役首發究罪關報到司又據昆明縣申稱查得本縣審編均徭冊內原無編送各鄉宦徭夫肆名折銀叁拾餘兩情由止是有任京宦及知府以上者每員於見役里甲內送甲首二名親身送給一年一換其中或有折收工價或令本人答應等項俱在各鄉宦恣意便處

再不與本縣相干從來相沿舊情當年有鄉宦十一員該編甲首二十二名送與跟役並無徵送銀兩無憑查報等因申報到司據此案照隆慶二年十二月十一日申時奉

本院批據在城堡申革各鄉宦夫役照詳奉批各鄉宦既有編給徭夫四名折收工食銀叁拾兩餘又復占役堡軍豈不乖

國典乎仰按察司議革通詳此繳奉此案經移關清軍驛傳道并行昆明縣查議去後今據前因該本司掌印按察使徐祚會同布都二司掌印左布政使鄔璉署都指揮僉事趙弘祚清軍驛傳分守兵

巡道左叅政朱珍副使陳時範僉事楊脩議照在
城堡夫額役迎送原額名數有五百餘亦自不少
蓋因政出多門致使差撥濫冒役占星散遂有不
敷及扛擡勞逸未均深為時政疲蠹今查得

三堂衙門與各司道俱撥夫八名外加幫貼八名
沿襲至今切緣前夫朝夕應役原無重勞僅於省
城往來且又月支口糧六斗又加倍貼似乎甚濫
相應裁處及查雲南府近議知府堡夫八名清軍
理刑官各八名如遇奉差往外郡公幹臨時呈驛
傳道發單添差候畢仍發堡輪差外郡在省取委
聽差官知府同知知州以上亦發轎傘夫六名事

畢各將役過日期報總司驛傳道查考至於各鄉
宦該道所議致仕部院京官及知府以上方面官
俱准撥堡夫四名其餘有司以下俱盡革回堡應
差不得濫用但各鄉宦居家論法不當役占軍丁
相沿已久省中居住有往來不得已者擬撥堡夫
係役使軍人又干明例如盡革去恐出入不便相
應量為酌議合於本家餘丁內處撥自部院京官
知府以上方面官每員五名運判知州知縣以上
每員三名如數幫貼以彰優禮之意其餘俱行盡
革如係民籍亦照前數各審幫貼其昆明縣民僅
二十六里附省差繁應答諸司又兼連年兵荒億

困已久未得少蘇民病日深今乃以甲首擅給各
宦差出無名不惟民不堪命更非

國家法體及查各省事規九里甲人夫須

內閣部院大臣積有勲勞須奉

欽賜歲撥夫幾名優給方許有司撥夫今本省有司官

因仍阿承不恤民艱有乖

國法致蒙 本院軫念民艱鈞批查革俱應盡革以

甦民困及查在省各鄉宦中間有幾家雖遇該縣

堡送到堡夫甲首本宦壹不留用可見省中無此

舊規亦以鄉黨爲父兄宗族之所在不得濫用軍

甲且役使軍人違例治居鄉之厚道宜爾也但撥

給宦夫恐不獨在省爲然而在外各府州縣或皆

有之仍該通行裁革以舒民力用正法體及照撥

夫先年呈議置立小牌在司每遇公差用夫赴司

查給每牌一面撥夫一名近年設有驛傳該道專

督查理夫馬前項小牌應歸該道給發稽查庶事

體歸一稽考亦便合候詳允將三司并各道合用

轎夫止正夫八名貼夫四名共正貼十二名革去

貼夫四名如四兵道四巡道叅府巡歷回省該堡

臨時查點撥送入名起馬之日發堡輪流應差不

得藉占躡雲南府查照近議知府同知推官俱

給堡夫八名外郡公差委官自知府同知知州以

上各夫六名俱止正夫應用不許幫貼該堡將撥
過餘丁姓名開申驛傳守巡道知會查議三司首
領并通判州同知縣以下原撥堡夫俱行禁革其
各鄉官於本家餘丁內撥給自部院京官知府以
上方面官每員五名運判知州知縣以上每員三
名如係民籍亦照前數各審幫貼其餘以下俱行
盡革昆明縣撥送甲首不拘大小顯晦一槩永革
發回本里照依成法催辦錢糧勾攝公務毋縱皂
隸下鄉勾擾小民有司不許市私干法該縣不得
占爲直廳差遣餘如外郡各府州縣有送各鄉官
甲首徭夫人役俱照今議悉皆通革有司官不得

私相撥送貽害軍民敢有故違查照役占軍丁見
行事例參究見任鄉官果有公差便道回家須臨
時呈請驛傳道撥給事畢發回不許該堡僉撥冒
濫原送

本院轎夫內正夫八名貼夫八名請乞

鈞裁以均勞逸本司原置夫牌歸併移送該道給
撥專稽冒濫不均之弊仍將允由備關清軍驛傳
守巡兵滿道轉行府州縣查照釐正禁革并行昆
明縣及在城堡一體遵行永爲定規仍委官將該
縣堡原撥送各處堡夫甲首今革省出人役與實
在聽差數目姓名盡數查出開報備閱行縣發堡

填報循環一樣二本申送本司并驛傳道覈實印
發輪流挨次點撥查有賣放私占躲閑避役者查
究及藉由紊規許偏累之役并諸人舉首或司道
查訪得出從重叅治本司仍出給大字告示張掛
曉諭如此庶里甲無違例重役之擾堡夫無冒濫
不均之嗟法紀既正輿情允服矣爲此呈乞照詳
施行奉批有司役占官軍明例何在鄉宦擅用堡
夫濫索里甲法體尤非清介豪傑之望有見於此
必爾不忍爲也該司所議良得剔蠹甦困之意如
擬通行給示曉諭遵照此繳奉此又蒙
巡按田 批看得所議革奸弊省差役真爲國爲

民之心也俱依擬行繳蒙此又奉

總兵沐 批滇中鄉宦籍在軍衛者衆也今查冊
內揭撥餘丁不止三名矣蓋出自作興原非正典
而又加以役占堡軍甲首誠爲濫用果與

國法甚乖事體迥異據議減革三司首領并通判等
官夫役深爲隱卹疲困獲蘇足見愛民如赤子也
仰依擬出示嚴禁着實稽考應揭貼丁再查今議
如後多占者掣出另差繳奉此合就行委清查通
行遵照爲此已經彙行羅雄州知州劉應明查照
案驗內事理親詣在城堡清查該堡實在夫役若
千名見在差用若干名今革出若干名逐一清查

點視明白備細開具姓名夫牌呈送驛傳道收候
查給施行及昆明縣原撥送各鄉宦甲首徭夫人
役俱照今議悉皆通行查革不許仍前私相撥送
一併查明具由申報仍令該堡置立循環文簿一
樣二扇申送本司并驛傳道印發輪流挨次點撥
每雙月填報查考

雲南等處提刑按察司爲欽奉

聖諭事准本司掌印按察使徐 會同清軍帶管屯田
水利副使陳 關准本司關准雲南布政司照會奉
欽差總理江南等處鹽法屯田都察院左副都御史鄒
案驗前事奉此又奉 本院鈞牌仰司着落官吏

一即便轉行都按三司并鹽屯守巡兵備等道督同
軍衛有司掌印等官備將鹽法屯田利弊所在應
興應革事宜各先逐一博訪廣求真切詳明務使
軍民商竈均爲利便者開具揭帖并脩考鹽屯一
應冊籍先行差人齎報前來以憑參酌施行等因
奉此備開到職除鹽法事宜該布政司會同鹽法
道呈議外爲照屯田之設乃古者寓兵於農之意
滇省各衛軍士以七分屯種三分操守尤

祖宗不易之成規况滇多夷方難比中州合省有司民
糧止一十四萬有零其他遠夷止於差發解納開
設之初以軍禦夷立屯田廣招士卒故衛額糧計

三十八萬有零又兼清出職田行租糧米入厥此外仍有馬料稻穀公祿田租蕎糧地租等項徵銀解貯以致屯糧數多見奉 本院憲約至詳至備但相沿日久弊端漸滋屯田之廢惟滇雲爲甚滇雲之中又惟附省六衛爲甚各職遵奉明文竊詢目前利弊稍得一二條列開陳合候呈詳允日備行本司屯田道會同布政司通行所屬一體遵照施行

計開

一查屯田以清弊源

前件照得本省各衛所屯田額撥七分軍其項畝坵數原有圖冊定制每軍一名領田二十畝除牛犁種子外歲納屯糧九石一斗二升以補三分軍口糧此固

祖宗之良法美意但沿襲年久奸弊日滋管屯管伍官旗更代不常每遇徵收之期不問田數虛實荒熟管屯官惟事催徵管伍官旗惟事催徵糧頭而已糧頭則與領種各軍通同作弊私相與賣互相欺隱更坵換段以成熟之田而爲拋荒瘠土以膏腴之畝而爲水冲石壓田之虛數雖存其實莫能究詰每捏虧額告撥餘丁乾認虛糧幫貼敷補以足九石一斗二

升之額謂之乾認餘丁不惟影射屯糧又且得此餘丁二三名之幫貼每認一二石者則計其三丁之貼而九石一斗二升之外得乾認糧六石矣遂至田連阡陌者坐享肥利家無寸土者乾認虛糧皆由上下不能查覈以致田數不清得以展轉作弊也爲今之計合行屯田道會同四兵備道各委廉幹官員吊取諸司先年近日魚鱗屯田底冊督同該衛所管屯管伍官旗拘集屯種田隣及年老知因人等沿坵履畝踏勘明實要見坐落某處某屯田係某軍領種有無抵換典賣欺隱情

弊有無拋荒沙瘦應否乾認逐一清查的確備開地名坐落四至坵段等項圖形造冊詳報內田數與老冊不同者就便追究領納之人有何緣故果有拋荒者就與設法召募頂種限以三年之外照例徵納果有沙瘦者查照減輕事例徵輸果有抵換欺隱者照例科罰或免其罪仍罰以開墾拋荒田若干以示懲戒然乾認之軍若受賄賍其節年查訪抵換欺隱典賣屯田之人及拋荒之地必真但愚痴無力或不能首報仍行令榜諭此等乾認被累之人首告清查若此則屯田有所着

落糧額無復虧欠且免乾認虛糧之弊而不致重累貧軍矣伏惟

鈞裁

一脩倉廩以備輸納

前件照得屯糧收貯莫急於倉廩而弊害之甚亦莫不由於倉廩六衛遠屯去省會甚遠不便運納就于每屯之內建廩三五間以便各軍上納此固相沿舊規也然雖遠于省城莫不近于州縣况村屯之內一則無城池衛護一則無衙舍關防俾各經收委官到彼借住屯甲之家始而無事本色任其加耗折色任

其乾收及其既久而跟隨吏書通同家丁混爲一室其委官知自愛者固不階其計中一或不慎奸刁之軍見折色之盈囊遂謀爲撒騙之計肆奸挾制坐視納本色者不敢責備其糠粃納折色者不敢責備其貨物屯政由此而弛玩屯糧由此而逋負倉廩之設誠非緩圖也爲今之計除舊有倉廩堪以收貯外凡附近于各州縣衙門者必就將原建立在各屯倉廩令其拆移于各州縣治或屯堡市鎮處所修建俟秋成之期使搬運在彼上納每一百戶設立軍斗二名就令在彼看守各

經收官亦要在彼住劄不許下屯其各糧頭
催事人役每五日開報收過糧數各該州縣
掌印官處備查收完之日取各州縣官吏并
委官不許扶同甘結呈報本司屯田道知會
備照如此則錢糧不致于虛報防守不致于
疎虞且各軍無憚于搬運之難而屯官屯戶
交通折納揭賣之弊亦少矣伏候

鈞裁

一兼本折以惠貧軍

前件照得屯糧徵納莫便于本折之相兼莫不
便于本色之全納本色全徵雖屯田之定制

其或有災傷減徵折銀者呈告本司屯田道
會議呈允酌處經收委官管屯指揮千百戶
豈得私自任情耶今查遠屯沿襲之弊本色
米未收十分之二三卽收折色以充私囊每糧
一石或折銀一兩或七八錢有之視各軍之
強弱爲收受之多寡雖至少亦未有七錢以
下也似此納糧之貧軍矣便耶及其坐放之
時操軍苦于搬運之難耽延之久名雖支糧
一石計其花費不過止剩其半矣以故或賣
單于坐糧識字之軍或揭借于殷實之家或先
減支于經收之官每石不過銀肥二三錢之

數而止矣似此支糧城操之貧軍矣便即爲
今之計合行屯田道會同布政司酌量地里
之遠近查水路之通塞或附于州縣之近水
程之可通者令納本色七分以備積貯折色
三分隨糧搭支其遠于州縣又係山路從陸
者方許本折相兼以從其便仍明出榜文曉
諭各軍每石委官原私收七錢今止納銀五
錢令各軍佃執前原散給由票赴官查對收
納不許管屯官糧頭包攬使小軍必沾實惠
外郡折色解附近有司官收候搭支其六衛
折色候徵完類解布政司間月搭放如是則
搬運不勞倉糧可完不惟便于貧軍而出入
侵漁之弊亦可革矣伏候

鈞裁

一禁科擾以專責成

前件照得各衛所管屯管伍官旗下屯催糧卽
多帶軍伴以爲牙爪大作聲勢以肆科取每
日有供應之需常例之饋且濫受詞訟巧爲
科罰至于跟隨人役終日酒食馬草馬料打
發銀肥皆取給于屯頭而屯頭又行科派屯
種軍一遇本官違限住俸則屯頭又有補俸
之科分派屯軍倍償一遇監併本官家屬則

屯軍又有供飯之科其實未嘗有真正之家屬在監一切雇募棍徒坐監一日貼銀一分打一板貼銀三分而管屯管伍官又自有弊收之弊只恐各屯攻發陰私只得因循怠緩以致錢糧不清日後比較又以扣俸爲詞殊不知所扣俸少所收糧多雖十年之俸不足以償一年之逋節經比較不過徒事虛文反滋無厭爲今之計凡管屯管伍官下屯催徵止許帶馬夫一名識字一名軍伴二名無得多人驚擾地方絕其饋送免其供應并馬夫支食草料一切靡費等項先行禁革則管屯

官既能潔已自足以服人心屯軍無別項科派自是以完糧額敢有不遵嚴禁仍蹈前弊致逋負侵欺者許諸人許首除追贓革職外照依所科加追一倍給訐告之人與被害之家充實有能廉慎自愛刻期徵完者照例旌獎尤必立限四比之法初比責之糧頭小甲二比百戶帶糧頭小甲同責三比千戶帶百戶糧頭小甲同責四比管屯指揮帶千百戶糧頭小甲總比各責每半月一次五比不完將糧頭肘鎖監追另拘花戶審查不惟徵納如數而科擾旣革軍人蒙惠矣伏候

海臺行禮
卷二
鈞裁

一禁私收以懲包攬

前件照得遠屯其弊固多而武職無知貪得科
害殆有甚焉今各官雖有管屯之任不過令
其催督而已何嘗許其私收近來凡有管屯
差委即便越分徵收計索分例及到屯所不
候委官輒行收攬爲之代納且不照數完官
就以無徵藉口屯糧難完此其一也爲今之
計必明出禁諭凡衛所管屯官員止許催併
不許私收各上納軍佃俱要親執前給由票
赴倉查對聽各委官眼同親管旗甲收受明

白另給本倉完票一張以爲執照亦不許仍
前聽信奸徒誑哄貽累如有不遵禁約敢干
故違者查出或告發官照例坐贓叅究如律
軍則枷號痛懲不准追給如此則事有專責
人心警畏私收之禁旣嚴而包攬之弊可除
矣再照官攢斗級有守支看護之責監收委
官有顯主收納之責總監掌印官有職掌屯
折貯庫之責屯官私收官攢斗級不爲開倉
監收委官不爲准數則彼亦焉得擅便屯官
折色數多不付監收官轉送庫貯而總監掌
印官不許延捱則彼亦安得侵收在身却乃

互相容隱豈無各有情弊今後屯官收併折色不轉送寄庫官攢斗級與監收官不行首覺一併坐贓總監官亦行坐罪每月各官併攢斗仍取具屯官不許私收甘結呈報庶屯官雖欲擅恣而動輒掣肘矣伏候

鈞裁

一公較掣以謹權量

前件照得各倉收納皆有官設斗斛法子印烙鑄鈐而通年監收或將官置斛斗法子沉隱另設重法大斛以便多收夫監收之秤頭火耗淋尖踢斛倍耗多收之弊固不止于私設

斗斛法子而私設此具又其無形之耗屯戶之暗損也及至入倉則默扣積附巧充額石而以未納之糧賣放免收價入私囊此又官儲之暗損也而通年嚴禁則亦告諭之而已彼納戶者見其有斛有法子而已誰能辨其爲官與私耶近該司道會案議允委官監收內亦申禁此項情弊及照京倉皆有掣斛之說以此斛掣彼斛也今欲革此私置斗斛法子合無將官中原置造天平法子斛斗則式行有司掌印官較勘相同行各監收委官查照廣狹輕重每屯置造一付給與屯內各村

納戶輪流收掌每歲開倉及支放之時收掌
之戶會同各村每十戶一人與屯軍同赴監
收處掣對訖各戶眼封付屯甲頭人收執每
屯戶上納則執此斗斛法子先行較掣明白
然後秤量本折倉糧完日仍付輪流應收屯
戶收掌如此則官物不敢私設而納戶軍供
免于耗損矣伏候

鈞裁

一嚴徵收以杜侵漁

前件照得屯田積弊莫甚于徵收之間每年秋
成之時該屯田道會同各司議呈委官徵收

其法固善但中間廉介自持者固有而貪得
科害者類多加收侵剋之弊况有告准災傷
減折徵銀者所以乘機折收職此之故也其
弊害奚止一端而已為今之計既查的田畝
必將種納軍佃冊報本司屯田道每軍各給
由帖一張或本色若干災傷若干明開單上
註定完納限次俾各軍納糧之時各執付經
收官查照收納每屯原有額管總小甲嚴令
每年十月初一日為始俱赴委官投遞管下
本屯軍佃姓名數目以便查考各旗甲就在
該倉眼同收受不許回家捱避仍于屯田道

請給簡明嚴示在倉張掛不許多收斗頭樣米不許淋尖踢斛不許那移折乾如有故違許被害軍民陳告依律問擬每五日具數開報附近該管有司掌印官知會候俱收完仍照原收一尖一平交盤與附近有司掌印官封鎖監收官卽回聽候掌印官坐放雖有鼠耗就將原收斛面一尖之數准除及其支放須憑布政司當堂坐撥不許當緣該吏不許預先揭買凡食糧操軍每軍散給長單一張先造本軍年貌軍妻某氏後作十二格眼每月支糧之日執此赴官查驗年貌相同方准支領就干格眼內填寫親身支訖字樣若查驗不同卽係揭買務要嚴究如律若此則催徵皆本屯之旗甲而委官不致于擾害支領係親戶之本軍而侵剋之宿弊可除徵收之法誠不可緩也伏候

鈞裁

武定勘功罪稿

一查得嘉靖四十五年某月某日先蒙

雲南巡撫部院呂 案行本司會同布都二司各

道已將前項功罪論列通詳外今蒙

本院奉到

都察院勘合案行本司復會二司各道覆勘明實
分別詳報等因蒙此遵行會勘爲照功罪欠明則
勸懲未當勸懲未當則人心不平自慚矇矓恐紊
低昂先次止據哨報而事在倉卒見聞容有未真
今復再三酌議而日久論定耳目自難終掩若不
據實呈詳則上有負乎

明見下且拂乎輿情故敢不避人嫌直叙優劣仰候
鈞裁定奪議照逆賊鳳繼祖火頭孽子爭襲起釁先
判行撫尚冀改圖心肯陽降陰懷異志結惡黨而
羽翼漸成干天誅而劫掠愈恣遂敢逞兵戕害方
面若非乘機以撲滅不免貽患於將來仰仗

朝廷之德威無違

廟謨之英斷以致賊屢敗而計窮黨內離而獻首元
兇既殄餘孽悉平茲皆

雲南巡撫部院呂

信義孚而士酋聽其調度謀

猷定而將士勇於折衝奏膚功於一捷貽治安於
百年

四川巡撫譚

誠心體國助軍威而彼此夾攻協

力除殘挫賊氣而表裏交敵

總鎮衙門沐

身膺重寄計除元惡以安地方祇

奉

綸音務展徽猷以明忠赤此其文武協謀勲勞均已懋

者而權衡在上司道未敢輕議者七為照臨安兵
備右叅政兼副使今陸貴州按察使盧岐嶼心竄
任怨事不辭勞紀律嚴而將卒無敢違令籌畫當
而進止咸適機宜瀾滄兵備副使今轉木司提學
副使楊守魯沉毅有謀明敏善斷倡勇過江而賊
勢因迫衝營破陣而賊膽遂寒管糧右叅政陸綸
誠能動物恩足結人先督餉而轉輸不誤軍機後
監軍而搜捕每擒叛黨右叅議曾一經簡靖之資
不難於繁劇鎮密之見尤善於稽查轉運有方而
軍役不擾料理悉當而侵匿潛消原任都司今陸
叅將袁蔭質直無偽忠勤自持嚴防守而計善搜
擒把險隘而賊免奔逸以上各官親歷戎事勞多
功最似應首薦者也外有先任都司今披論回籍
指揮同知徐高儀容壯偉氣力剛強始雖臨事畏
難不免逗遛而欠銳繼蒙

兩院督責深入箐險以收功雖經前院之論劾亦
難泯其功勞似宜准其贖罪而免其聽勘者也先
任按察司清軍副使今陞甘肅行太僕寺卿張天
復監軍武定頗有防禦之勞而去後議生稍為前
功之玷先經序居首列今尚未敢定擬仰候

鈞裁布政司左布政使今丁憂劉思潔志戡叛亂首
定剿賊之謀慮缺軍需曲盡供輸之計右布政使

今陞左布政鄔璉心術忠勤才猷練達署閩篆而
戎務之料理必周協藩政而軍儲之運餉不匱右
叅政今養病何鐘事體素諳經濟多能督運而緩
急適宜億事而機宜適中以上司道各著勤勞似
宜并薦者也其他武職官如指揮李朝臣之死守
孤城多方禦賊指揮胡大賓之臨危奮勇造船多
濟先任指揮今陞都司金堂之身先勵衆竭力守
城守備袁位之領兵深入不避艱險千戶胡瀚之
隨護張僉事甘以身同生死以上各官功宜首錄
而指揮盤珠之盡忠滅賊冒險不避後雖病故功
與李朝臣等韻頗似宜優恤其後者也如指揮王

龍劉用仁李柰郭斗侯仲盧雲李騰霄千戶孔世
英杜韜陳堯道尹鳳梧徐高王朝恩百戶楊宗正
石盤許鑑以上各官或捧旗牌而催兵督戰或押
兵餉而擒賊護糧均當量加獎賞以示激勸者也
文職官如先任同知今陞本司僉事趙龍之臨敵
致勝覈功明實通判鄧世彥之善撫疲郡保障有
方功應首叙而通判韓以孚之守隘不擾知州吳
淮之糴米速辦王詔之入寨不避劉應明之入蜀
請兵知縣羅士英之招徠夷民通判徐子麟孫應
鵬知州劉璧知縣邢繼先之收支軍餉稽查無弊
及同知饒才通判白采知州朱瑤知縣周德經歷

董季張允以上各官或調發兵食而贊畫機務或
奔馳戎伍而同冒矢石均當量行獎賞以示激勸
者也知府周贊先已論功居首卽其防守武定固
嘗効勞及夫叛黨突興我軍多損始雖彌縫於一
時終難掩飭於事後但其治府頗得乎民心行事
無玷於官守功固難以并錄罪似可以情原者也
知縣李友栢昔以勸處適宜亦預首錄之列今以
貪酷提問有辜屢薦之榮均難復照前議者也其
土官舍功應獎賞者已蒙

欽依頒賞不復槩叙外如祿紹先之聞調速赴赤心剿
賊如那恕之選卒赴敵奮身解圍至于攻圍日久

賊勢漸窘致者已之密約而殺賊祖以獻功則紹
先之功居多而那恕亦與有力焉者也土舍高忠
高承祖章講土官阿朝用統番兵而併力衝鋒乘
刦營而挫賊銳氣使阿五喪膽而遠竄逆賊勢孤
而計窮則皆以上四人之協謀也安素儀督兵防
緝阻賊東遁而用計搜箐擒獲叛囚阿方土官段
一機奮身率衆擒斬獨多於別營高繼先據江防
守黠賊庶免於他遁以上各土官功應首錄似宜
奏

請祿紹先准復祖職那恕量給冠帶安素儀准代夫職
段一機准復原職高承祖准其承襲高忠准給冠

帶其阿朝用已襲知州章講已有冠帶或另請加重賞報効吏王本嵩統率家兵同心剿賊斬獲亦多似應併叙通判胡文顯指揮趙瓊不能量敵後進以圖萬全之策乃徒妄動取敗以喪我軍之氣後文顯運餉勤勞瓊亦深入賊巢終皆策勵求蓋前愆指揮干鳳朝始而僨事固難免罪繼知敵愾僅能立功土舍張立楊汝積一以搶掠而畏罪潛逃一以守隘而避難托疾但冷村破賊斬獲亦多以上各文武官土舍功罪相准罪宜准贖功難槩錄者也千戶諸愛被搶而潛避百戶李文潮催兵而後期千戶雷應孝百戶李元德更班押運而坐

視不行徐應爵遇賊劫營而退縮不救經歷田舟臨事妄爲而運餉多誤此皆功不勝罪所宜戒飭者也通判周良卿六塊劫營畏敵私遁指揮梅子仁沿江督兵詐病規避指揮金重懼賊徇私望風退縮千戶王言押夫渡江未至姜堡而先逃潘彥元朱繼秀承委姜州潛回羅次而不進陳壘戚鳳恩繆以正鄧惟揚百戶王胤元石廷珪張應舉王應祖楊鶴或押運而遷延不赴或領兵而稱疾逃回典史秦公綬拿獲奸細擅自釋放鎮撫未良臣賣放運夫營私玩法此皆罪浮於功法當叅究者也百戶任綉承委調兵受賄稽遲致戕憲臣有誤

軍務此又情罪匪輕法當重究者也尋甸府冠帶生員杜經初本報効聽差將以計擒阿遮後因機密泄漏致令聞風遠遁論法亦當重究但今阿遮既已招撫免究則杜經似宜從輕發落者也其千戶劉裕李躬行李臯百戶李鰲省祭李燾生員楊忠惠吏張大紀馬應時羅應明奮身奉公臨敵授命百戶程世勳都朝陽孫采李國賢沈得寬典史涂恩守法任事冒險忘身均屬可憫似應仍照前議優恤者也如此庶功罪別而人心益勵奸宄彌而地方永寧矣緣蒙通行會勘事理擬合覆議呈詳請乞

鈞臺再加甄別酌量功罪奏請施行

雲南按察司爲查處遠屯糧米以便收放事准屯田水利道關隆慶二年十一月初九日申時蒙

巡按劉批據本道條陳十二事照詳蒙批據議處置屯田之法井井詳悉於此叢弊極靈之中而能如是悉心講求興利剔害勤意行之屯政未有不瘳者矣然詳閱欵中大約較而論之戶數宜籍也本折宜均也越收宜禁也期會宜定也交盤宜責也宿弊宜書也城廩宜詰也差委宜慎也八者依擬如法備行其曰派分徵以速完納恐貽十羊

九牧之患其曰定供應以塞濫妄恐滋指一科十
之愆其曰稍從宜以順衆便恐招營蠅集穢之漸
其曰先有司以窒弊源恐碍越俎代庖之嫌固不
可不爲之熟慮也四者再會議諸司通詳此繳蒙
此移文前去煩爲會議通詳施行等因到司行間
又准該道關本月十六日申時奉

巡撫陳 批據本道呈同前事奉批屯糧之蠹惟
滇中爲最該道反覆條議可謂綜理維密政善法
良自將奸欺莫容風清弊絕矣其於廣儲蓄甦軍
困無濟遯方利益何似悉如擬行仍嚴禁副徵官
員敢有分外誅求致使額糧逋負卽行坐贓叅究

此繳奉此備關前來該本司按察使徐 會同帶
管屯田水利道副使陳 依蒙奉將該道原議除
詳允八事外其三曰派令徵以速完納八曰稍從
宜以順衆便九曰定供應以塞濫妄十二曰先有
司以窒弊源四事各熟慮其理之宜否與事機之
便與不便逐一再加會議詳當合就通行呈詳爲
此一呈

巡撫陳 今將覆議過條件事宜逐款開坐理合
具呈伏乞 照詳施行 一照會經歷司 今將
覆議過條件事宜逐款開坐合行照會轉呈
巡按劉 照詳施行

三曰派分徵以速完納照得云

云

前件本司會看得屯田道議稱各衛屯中糧至

一二千石以上者通添協徵官員分遣催徵

一節蓋謂糧數既多地方必廣原委一官管

徵難以及時通歷恐至秋收已過糧戶花費

難完欲請量數添官分投協徵使催納及時

糧可速完其意固善但熟計之軍職官員多

不畏法管屯之委莫不垂涎誠恐協徵之委

一行科擾之弊差勝而十羊九牧之蠹勢所

難免今蒙

本院鈞批深悉弊源及查該道議稱有輔徵

事規再為申明通行所屬衛所衙門遵照其

協徵之委不必復議添差以滋十羊九牧之

患庶官徵有專責而屯戶無科擾矣伏乞

鈞裁

八曰稍從宜以順眾便照得云

云

前件本司會看得該道議稱屯田之弊究其少

有害亦少有利可以革可以無革者則納戶

之抵扣月糧攬戶之包認上納斯二者是也

欲革倉場攬棍不如釋其有身家有恒心者

籍其姓名在倉明為額定攬數有途遠納戶

情愿付納者照秋收交價值量遠近給腳價

不許欺哄過取亦不許多攬至於納戶願將
月糧抵扣者其家米免運入倉倉米免運入
家示以聽攬而爲之額不詰其抵扣月糧之
罪一節蓋謂遠也佃戶多不能親身上倉俱
許從宜聽便交諸攬戶代納使錢糧得以易
完及以各軍應支月糧抵扣本軍應納之數
以免支領運納之勞是擬議於常法之外而
權宜爲救弊之計其意亦欲便軍也但熟計
之倉場攬納之戶多係棍徒鮮有家業其色
攬花費者往往有之恐攬納之端一開積棍
皆得藉由愈肆兜攬花費其末流將不勝獎
矣又如抵扣月糧之議尤恐各衛屯軍亦多
玩法合納錢糧追之尤多逋負若使此議一
行恐各軍應支者既准抵扣而重復冒支應
納者恃頑推避而影射不納俱難以稽考斯
二者俱似應不必議行庶攬戶不得藉口兜
收軍士不致冒支推延而營蠹集穢之漸亦
可杜矣伏乞

鈞裁

九曰定供應以塞濫妄照得云

云

前件本司會看得該道議稱管屯官量准令納
戶每日給肉柴米菜共值銀伍分監收官收

糧納戶供應亦如之及行各衛所每年量將
堪動銀內給與伍錢作爲造冊工食各一節
蓋謂上年管屯監收官下倉需索屯戶供應
下程酒席馬料及科歛造冊工食之類今欲
議定供應則例以示之使屯戶各知簡約而
委官不敢過取此蓋欲委官養廉屯戶省費
意本良也但熟計之屯頭糧甲之輩多肆狡
猾逢迎委官饋送常例復倚稱供應指一科
十殆所不免且此等弊端革之尤恐其蠲與
若復議加供應恐在官之需未免而軍家之
費猶存似非所以防微漸而振法紀也合仍

遵奉

本院條約禁諭遍出簡示再行申明痛革委
官不許索饋下程馬料及造冊使用之費屯
頭糧甲等役亦不許指稱科歛害糧戶如
有故違從重究遣其供應之擬似不必議行
以杜指一科十之弊伏乞

鈞裁

十二日先有司以窒弊源照得

云

云

前件本司會看得該道議稱民間里有長戶有
甲里甲有排年每歲錢糧互相催徵故輸納
亦不甚負若以各衛屯政稍倣編戶之制將

姓名戶數糧額編爲冊籍隸之有司徵納衛所印屯官只每歲于有司取實收以報司道未不得預屯事雖監收官亦可無委有司亦設邪簿朔望責令頭人赴邪欲其服習於有司示以屯事相關一節蓋謂雲南各衛印屯等官得肆其志而屯軍被害獨甚於各省以滇中民少軍多欲將屯軍專之有司之良以祛武弁之弊耳但熟計之軍士隸諸軍衛民戶屬諸有司此相因成法若欲各軍冊籍盡屬有司朔望點邪等項竊恐互相推調反生疑駭矧近奉勘合內開軍衛不屬有司事體未便有司既徵民賦無理亦難等因通行在卷合無以屯糧仍委有司監收而催償之責歸之衛所等官庶於成法固無相妨軍士亦無紛擾而越俎代庖之嫌亦可免矣伏乞

鈞裁

一爲禁革屬衛科派饋送以恤貧軍以肅戎政事議詳禁革軍官陞任不許饋送上宜緣由照得各衛所指揮千百戶等官之設本賴其管率部軍捍禦地方以弭盜安民也滇南遐荒僻壤物產瘠薄武官中類多貧乏乃訪得各官初陞都司守備等官到省有假稱饋送總府名色科擾各軍分例備辦

鞍馬山鹿金色段疋西洋布古喇錦土宜等物饋送以爲謝禮贄儀計費銀不下百兩各官縱使富饒自於法紀有碍且急難營辦不免借貸於人或科索於該管屬衛所衛所應辦無措必加派於部伍軍餘其勢然也雖未知總府受與否而各官科取之贓已不入貧軍之手矣况邊省軍餘貧苦最甚本等差役猶各應不前而額外濫派其又何堪是剝削軍脂敗壞官常法紀既乖軍殃奚忍即今都督府新蒞事之日正宜清脩率屬蒞滌宿垢以惠養步伍一新耳日上報

國恩可也否則地方奚賴是爲哉雖有通行禁約似

爲虛文猶恐踵襲舊蠹况各官陞任之初即揭債饋送以後歷官安望其守已恤軍以做好官哉相應申明嚴禁合候詳名本司備行曲靖等四兵備分巡道通行所屬衛所指揮千百戶等官遵照今後凡有陞任來省公幹不許踵承宿弊指稱謁見總府饋送謝禮贄儀名色如前項鞍馬山鹿金色段疋西洋布古喇錦土宜等物需索各衛所及各衛所官依阿濫派軍餘科擾者在省聽各司道在外聽該兵巡道查叅重究如律遇有夾帶儀物潛入省城饋送者許各把門巡視官搜捕拏送從重叅究庶蠹弊振刷法紀嚴明而上下相成軍政自

蕭矣呈奉

巡撫陳 批餽贄之弊茲值

清朝内外文武大小群工百僚禁止濯礪漸行釀成羔羊素絲之風矣但恐遠徼下官容有不知自愛自檢者猶踵舊弊假藉科擾漁獵不惟

上負明時有干清議抑且下剝窮屬自傷大體如議行各道示警敢有陞任武官指稱科索土宜困累部卒及執持前物來入會城者即嚴拏問招詳門官縱放不行阻回擒報者一併重究不貸此繳

巡按劉 批方今世道清明貪墨之風又息又况督府新任幹蠱之念宜殷各官尚爾踵襲餘風科

辦常例困軍貧卒何以堪之柰之何民不窮且盜也該司備行各道嚴訪痛革犯者從重參究此繳一為群奸撥置功臣上違

天命下管良民積怨漸深叛亂屢作懇乞

聖裁以預圖久安事會議總鎮庄田子粒附入有司催徵責令庄頭運納不許管庄人役下鄉尅害庄民緣由為照尺地一民皆

朝廷之版圖赤子也各省有功臣田土處所皆係軍民佃種止納田租其差徭仍聽本管衙門編定並不占護偏累小民今滇中遊方法紀積弛本鎮庄田內多續置有蒙

欽賜實為養廉酬勞各該庄戶原係軍民籍貫何乃召
為佃種田畝辦納子粒遂稱為庄戶之名不容官
司管束豈法也哉向因本鎮多聽左右撥置混差
管庄人役肆行尅害詢得每庄田一畝鎮中止得
租銀伍錢而管庄收至一兩四五錢以一倍而科
尅三四倍之多致庄民啣苦受累激而弱者餓殍
強者為盜屢釀釁端殊為地方隱憂致蒙

前院王 論劾節經題覆奉

欽依將管庄人役盡行禁革庄田籍附有司查催管束
通行各道督令有司遵行所貴有司以遵奉勸合
撫處小民為念將各庄民收附冊籍多方安集令

其依時耕種秋成將子粒如期辦完付各庄頭解
送本鎮如有荒蕪悉與勘明減徵寔安養黎元之
至意也已經移行各道督令有司遵照已久迄今
數月未據將庄民姓名庄田子粒數目查報前來
况今秋成已過近據三泊縣申據龍硎火頭欺本
告稱被總府管庄趙科陳俊故違

勅諭私下龍硎等庄除額納子粒外每庄科索猪一口
折肥八十索馬脚錢肥六十索催庄跟伴肥二十四
索每日殺鷄七隻雜碎食用鷄肉鹽乾每早鷄子
六十箇日用燒酒伍壺釀酒一瓶食米肥四十索
共得肥六大口袋有同庄李從福要謀欺本火頭

未遂捏告趙科陳俊等將欺本羊八隻車一把賣銀三兩三錢并耕牛二隻抄掠一空入已等情本縣拘獲審實監候申詳

撫院批行本司提問今本鎮仍差管庄下鄉尅害恐通省軍民受管庄人役之科害者殆不特三泊一縣龍硎一庄爲然也是視勘合爲彌文而地方受實害政體民情悉屬未安相應查處合候詳允查照原行備行各兵備守巡道除近省昆明縣八庄遵奉勘合聽本鎮自徵外其餘嚴限督責各府州縣掌印官將境內各庄處所拘集庄頭佃民田隣到官照冊逐查要見某庄坐落某處與何隣界

共計幾村要見某庄原額田地若干每年該納子粒銀米若干共有佃戶若干或軍或民或佃僕係何衙門版籍某人分種若干該納若干係何庄頭火頭人役管領查理明白備造文冊繳報

兩院及司道與存本衙門查照其間有軍民納糧田地或先被管庄人役懷讐投獻或係庄頭人等倚勢強占遺糧負累軍民賠納者悉令退還各庄內有應入官者照舊入官其各庄戶悉改附有司軍衛管束不得再稱爲庄戶各色背違勘合亦不許本鎮以別項調遣私家差用有累貧民且妨生理敢有棍徒不改前非仍行撥置拘遣者即從所

在官司等完照例問遣各個戶所納子粒銀米所
在官司定限依期完報赴本鎮交納亦不得過違
除應納額辦子粒銀米之外其餘不許妄立名色
加收分文及需索土產拜見馬脚等項如違坐以
誣騙之罪至於夷方遠庄與衙門隔別者亦照節
議行文止催庄頭赴納其各管庄催庄俱遵奉
欽依盡行革去敢有再行潛赴各庄私收子粒者聽各
衙門不分真偽密拏究實輕則各駢劄該道徑自
處治重則參呈兩院究遣如各庄頭火頭阿絃收
留不行報官拏解一體連坐重治其各庄遇歲時
豈檢全徵如有荒旱水衝沙壓等項即赴該管衙

門告理差官踏勘明實即與免豁亦不得隱瞞偏
累仍將議允事由與查過各庄民姓名田租照冊
出示及置匾於本庄張掛使衆悉知以一新耳目
俾知嚮往永為遵守斯

朝廷之法紀明而本鎮亦可以安止足之分地方之
隱患消而小民均得以蒙休養之澤矣呈奉

巡按劉 批本鎮庄田一節奉有

明旨處分慣惡庄徒尚敢挾勢橫行背違勘合豈奉公
守法長福求祿之道哉該司即行各道逐一清查
如擬造冊出示曉諭各庄求為遵守再有故違者
許所在官司拏解 兩院從重究遣仍取各庄依

准繳文奉

巡撫陳 批如議催行各道嚴限各該掌印官將各庄坐落界址地畝子粒數目并庄戶軍民版籍姓名查明造冊通行繳照其強占投獻者悉令吐退庄戶改附軍衛有司當差毋再聽其調遣差用若棍徒敢有故違

欽依仍行拘遣科擾者所在官司即嚴拏解究治戍遣此繳

一為申

明例正職掌以一政體以安地方事呈議革總兵官不許違例受詞緣由會議查得

大明律內軍民約會詞訟一款凡管軍官越分輒受民間詞者罪亦如之問刑條例一款內開在外軍民詞訟除叛逆機密重事方許鎮守總兵叅將守備等官受理外其餘不許濫受輒行軍衛有司問理等因欽此欽遵外夫

朝廷設官分職各有攸司

明例昭然豈容侵紊為臣子者奉公循理不敢妄越然後事體穩當軍民又安上下無怨鬼神昭鑒也故軍民詞訟事情頗輕者屬有司處分其事情重大者則申呈各司道轉呈

兩院裁奪此定例也各省沿邊鎮守總兵等官欽

奉 明例並不受理詞訟惟滇省僻在遐荒素茂
法紀凡軍民各項詞訟相沿踵習舊弊總兵混行
受理及查本鎮見奉

勅書內開本爲鎮守地方整理城池操練軍馬撫恤兵
民控制蠻夷也除叛逆機密重事外軍民詞訟於
例不容濫受蓋以所司者軍旅之事而詞訟事干
刑名原非所得與者法也夫

祖宗定制萬世不磨 明例森嚴四海遵守獨滇向未
申明故總兵官踵襲放告理詞批行都司斷事軍
衛有司等衙門 問理且奸徒多係私情聳准私下
乘機挾騙其承 問官或碍原告不能依律問斷則

被告多吞聲忍氣控訴無門上干

天和致生災沴在省操捕巡視指揮千百戶鎮撫等官
假此倚藉聲勢交通倒座家人等項名色違例受
財凡軍民有一應戶婚田土鬪毆等項小事動輒
指稱拏送總府多方嚇騙一得銀肥到手或不與
見官徑自脫放稍有不遂已私即使擅作威福妄
行網打墩鎖倉房蕩產傾家生不如死殺人以挺
冤怨莫伸至於鎮中佃戶田租家人私債等項亦
批問官究理甚至總府不知止憑倒座家人擅自
受詞科害小民吞冤受抑而不敢聲言蓋有年矣
近查得都司雲南府昆明縣斷事司并左等六衛

准行者多係身差錢糧田土等事每月無慮數十
詞凡所不及者又不知其幾也在省若此其在外
府州縣衛禦所又可知也如此狀詞原非叛逆機
密重情而槩行受理擾累軍民不惟

明例有違更於政體有碍軍民受病極矣即今都督府
蒞事之始正當思蓋前愆更善新政以上報

國恩相應申明正法以解積困倒懸之厄合候詳允
備行守巡兵備弁叅將守備等官通行所屬府州
縣衛禦所大小流土衙門及移行都司呈報本鎮
恪遵 明例除有叛逆機密重情遵行外其餘一
切軍民詞訟不得立期放告濫受有司軍衛亦不

許違例奉行各衙門自隆慶二年十二月以前有
奉行本鎮批詞俱不必問理查照今議事理遵例
徑自銷繳在省在外有司軍衛非叛逆機密重事
不必申呈本鎮其在省地方軍民違犯一應事情
俱聽雲南府昆明縣各巡捕官拏送該府縣查問
輕則量情發落重則申呈各司道轉呈

兩院裁奪不許操捕巡視指揮千百戶鎮撫等官
將地方一應詞訟事犯拿送本鎮聽理如有各官
仍前交通倒座家人等項騙害者聽各司道將
官拿問叅呈以撥置從重究遣近訪得在外
遠如騰衝衛近如宜良所舊日積弊凡軍民犯罪

在州縣者已問罪發贖訖管印衛所官又行問罰而管屯官亦如之管操官亦如之舉此而各衛所管軍官擅自受詞殘害軍餘大約可知也今後在外軍民詞訟俱聽府州縣有司衙門問理不許衛禦所管軍官仍前違例受詞有已問完者不許復行取問罰贖如有違犯聽各兵巡道從重叅究庶朝廷之律例申明官職之職掌自定本鎮自今以後庶幾不違 明例恪守

王章而凡侵越職掌擾害軍民諸所積弊自此洗滌而遐方免冤濫之苦蒙安靖之澤矣呈乞照詳施行 巡撫陳 批 明例鎮守叅遊守備操捕等官職

務戎馬軍機城池盜賊奸宄此外非所事也各省邊恪遵 成憲無敢僭違荒服上下倣效擅越政出多門十羊九牧地方之人奚堪該司申明此議爲官司明職掌正體統則衙門一清爲軍民造命脉伸冤號則邊境永乂也如擬通行遵照嚴禁敢再有或違犯者輕則各司道徑自查究重則叅呈處治此繳

巡按劉 批據議於地方甚益貧軍糶民有息肩之所矣近日安寧州報稱一夥棍徒指倚本鎮差人拷打平民嚇騙財物已行拏問未報餘可知也即如議通行永爲遵守繳

雲南等處提刑按察司爲群姦撥置功臣上違
勅諭下害良民積怨漸深叛亂屢作懇乞

聖裁以預圖乂安事行據委官雲南府知府董原道大
理府同知陳謨會問過犯人太增等招詳到司據
此案照先該

巡按王 題前事節奉 撫按衙門節准

部院勘合催促黔國公沐朝弼將太夫人李氏夫
人陳氏送往南京居住庄田藉附有司徵解首惡
蔣旭等作速發出究問等因案行本司已經行仰
會問去後今據招解各犯前來該本司掌印按察
司徐拭會同布都二司掌印左布政使鄒璉副使

陳時範楊守魯向淇方邦慶鄒光祚朱奎右叅議
曾一經僉事楊修任惟鈞署都指揮僉事趙弘祚
會審得蔣旭因充本鎮管家名爲倒座專權挾勢
肆行克惡糾結群姦多方撥置慘毒異常將陳夫
人幽錮之未已也而加之以絕其通問減其供給
又加以辱罵之未已也而必計殺其群小以杜其
口而滅其跡見得常學陳綉跟隨在府熟知前情
嗔忌專情心懷忿恨恐伊覺發遂就造謀與范譽
商同混稟將常學陳綉拏赴倒座細綁蔣旭亂踢
脇肋等處范譽用棍加功撮髮壓定主使李仲執
棍遍打傷重擡監絕食身死將屍拖去焚燬太增

不安職守投入總府自稱大管家生事害人赫受
段小金馮閏馬牛入已汪時雨舍丁投爲家人營
謀管庄嚇詐朶蘭銀兩陳大策恃勢索財妄行投
獻土官庄田李和許充委官綁打平人嚇取趙曜
賍銀蔣榮蔣福傳漏消息致脫罪人再三鞫審輸
服無詞切詳府招范譽擬以奴罵家長絞罪律但
查本犯止是畜養家人未經奉有

狀依給發爲奴槩難以奴罵家長律論似於律情未協
改擬謀殺從而加功情罪允當爲照蔣旭蔣鑑李
洲范譽李和各倚閹者家人恃強藉勢謀害人命
嚇騙成家胡尚仁結黨撥置潛住京師規探誑奏

靡所不爲各犯強暴肆橫地方受害蔣旭尤爲首
惡須各擬處死遠遣尚有餘孽太增土達越分倚
勢管馬管場嚇騙素著稱爲大管家橫霍一方陳
大策汪時雨投跟勢要巧爲索詐陳大策報獻人
庄汪時雨受財詐騙罔知法紀貪肆無厭未遣邊
戍其罪何辭至於岑光頭李洲雖稱無名詭姓然
株連濟惡各亦有據與首惡蔣旭蔣鑑仍於蔣榮
蔣福名下監併及行各該衙門嚴拏用正法紀以
洩群憤除庄田事宜另議會呈其二夫人起行前
往南京候奉勘合催勘另報遣逐內使仍呈本鎮
查照

欽依遵行參照雲南總兵官黔國公沐朝弼叨襲世勲
茂棄彝典戕虐骨肉忍於兒嫂而倫理已虧濫用
爪牙徧於漢夷而威福擅作抗違

君命恪恭之節奚存廣納庄田封殖之私滋甚聽撥置
以斃人于菑楚罔恤冤鬼縱科擾以剝人之脂膏
肆填谿壑蠅營逞巧則群姦爲之騙局重干

國憲狐疑鼓智則善類爲之中傷大拂輿情心術過
於模糊踪跡流於詭秘致有言官之交論屢奉部
檄之督催事涉乖違法應參究所當罰治勘處以
爲鎮臣驕盈剛愎殘橫不法者之戒但念其先世
勲勞尚在議功之例本頭方將省悔姑寬使過之

仁 恩威出自

朝廷各司道未敢擅擬等因呈詳

撫院陳 批據招各犯投跟勢要結黨爲奸撥置

害人狠貪虎噬營管庄田則誅求無厭庄戶叛非

一年報獻土地則嚇騙多方土夷幾至激變遠邇

騷動虐焰徧滇而范譽同謀致死常學陳綉二命

情極慘毒今改謀殺加功尚有餘辜也依擬併罪

牢固監候詳決陳大策等情犯深重遠戍允宜候

會 奏明文至日發遣李洲名既不同岑光頭人

亦無在且有部中勘豁之文姑免提餘如照行通

取實收管領狀附繳

按院劉 批范畧擬以奴罵家長於律情果欠妥而常學陳綉二命之死則皆有據也依擬謀殺加功律移附別卷併罪詳決各犯引律引例罪非一端死有餘辜細人稔縱至於如此陳大策太增汪時兩李和擬例俱當候會 奏明文至日定奪發遣李洲既名不相同岑光頭既人無實在姑免照提餘如議行通取實收收管領狀繳

一為再論鎮臣違命不悛懇乞 宸斷以正

國法事會問呈詳

欽提犯人蔣旭等緣由該本司掌印按察使徐 會同

布都二司詳審得蔣旭本為無籍光棍輒敢私自淨身撥置鎮臣二十餘年軍民久被其荼毒科害庄戶三百餘處夷漢咸恨其狠貪謀殺平人常學陳綉之冤竟未雪離間骨肉李氏陳氏之積怨何伸數年逋逃積惡貫盈擬寘重典猶有餘辜其所置田產皆由嚇詐取財於法俱應查沒入官董良鄧福故違 明例投跟總兵撥置用事積惡有年今乃枉法受財冒頂起解各擬戍遣情例允宜參照雲南右衛納級指揮僉事郭科趙俊中衛指揮僉事王世昌前衛指揮僉事楊春育後衛指揮同知趙檜廣南衛指揮同知王世隆畏權阿勢黨惡

容奸不查蔣旭等是否正身輒將董良等妄爲執
結上下朋比素喪氣於豪門彼此扶同遂其心于
枉法所當叅究重懲但首惡隨經緝獲原情似可
末減仍應革去印信冠帶不許管軍管事戴罪嚴
限緝拏蔣鑑正身獲日另行原任黔國公今閑住
沐朝弼怙終無忌長惡不悛蔑棄彝倫已絕恩于
母嫂敢行暴雪久播惡于漢夷本退閑而仍與鎮
事雖有都督祇具空名任積視而復剝庄民近在
賓川殆將激變占恠蔣旭撥置爲心腹幾至漏網
而脫辜故縱蔣鑑賄替爲爪牙難稱驚餌而遠遁
屢抗違乎

明旨臣節奚存慣申傷乎善人螫毒滋甚家聲盡壞

國憲難逃所當從重叅論者也但念其先世尚在議
功朝弼已經革任合無題

請嚴加切責令其痛自省愆惟復別議懲戒仍刻限緝
獲蔣鑑正身送官正法以後如再賣緣干與府事
貽害地方自干

憲典聽

兩院從重叅奏究處緣沐朝弼係革任閑住鎮臣
郭科等係軍職 恩威出自

朝廷各司道不敢擅便伏候 裁奪呈奉

巡撫陳 批如擬候奏

請明文至日施行蔣鑑等勒限嚴提速解毋延此繳又蒙

巡按劉 批蔣旭元克積惡造意殺人背主劫財朋奸罔

上造二十餘年之孽貫壞二百餘年之世家今得正法伏辜軍民舉手痛快擬以一死尚有餘辜董良鄧福原係鎮中撥置奸徒素與旭鑑表裏為奸誓同生死自投法網天道昭彰各引例俱為允當三犯俱牢固監候與犯官郭科等羈候奏

請明文至日施行蔣鑑正身刺期緝報

